

四庫全書

史部

欽定四庫全書

史部

關中勝蹟圖志卷

九至
十一

詳校官太僕寺少卿_臣李廷欽

編修_臣程嘉謨覆勘

總校官進士_臣朱鈐

校對官助教_臣胡予襄

謄錄監生_臣王元灝

欽定四庫全書

關中勝蹟圖志卷九

陝西巡撫臣畢沅撰

地理

同州府釋名路史春秋地圖同州為郿國地州之取名

以此

謹按同州志城南九龍泉九源同流故名亦足備一說

沿革一統志治在省

城東北二百四十里禹貢雍州之域戰國時魏臨晉邑

秦置臨晉縣漢屬左馮翊後漢建安初為馮翊郡治晉

改縣曰大荔後魏太和十一年置華州及華山郡改縣
曰華陰西魏改郡縣皆曰武鄉改州曰同州元和郡縣
志禹貢云漆沮既從澧水攸同言二水至此同流入渭
城居其地故曰同州也隋開皇初廢郡存州大業初改
縣曰馮翊改州為馮翊郡唐武德初復曰同州天寶初
曰馮翊郡乾元初復曰同州隸關內道五代因之宋曰
同州馮翊郡定國軍節度屬永興軍路金屬京兆府路
元初以州治馮翊縣省入屬奉元路明屬西安府同州

府志

本朝雍正三年直隸陝西布政使司領縣四曰朝邑郃陽
澄城韓城十三年改置同州府以州所治置附郭大荔
縣復改華州直隸州及所領之潼關縣為廳華陰蒲城
二縣並來屬焉又以耀州所屬之白水來附今共領縣
八曰大荔朝邑郃陽澄城韓城華陰蒲城白水州一曰
華州廳一曰潼關 府城通志城昉於秦蓋厲共公滅
大荔而築者元魏改州治於李潤堡刺史元燮表還馮

翊舊城唐易為方城明嘉靖乙卯地震城圯重築周九里有奇高三丈池深丈餘廣倍之門四東南曰大安西南曰普濟東北曰長寧西曰永定

大荔縣同州府志附郭釋名魏晉縣名晉武帝以大荔戎築城於此因以名縣沿革

本朝雍正十三年升同州直隸州為府以州所治地置今

縣地理沿革
與府治同

朝邑縣釋名通志本南五泉西魏改朝邑元和郡縣志

以北據朝坂故以為名沿革一統志治在府東三十里
漢臨晉縣地後魏太和十一年置南五泉縣屬澄城郡
西魏改曰朝邑隋屬馮翊郡唐初屬同州乾元三年割
屬河中府改名河西大厯三年復曰朝邑仍屬同州五
代宋金元明不改

本朝因之縣城明景泰二年建嘉靖乙卯地震後重築
周四里門五

邵陽縣釋名通志本有草國詩所謂在洽之陽也春秋

晉為合陽邑漢以名縣水經注云城南有郃水縣取名
焉沿革一統志治在府東北一百里漢縣屬左馮翊後
漢初廢永平二年復置仍屬左馮翊晉因之後廢後魏
太和二十年復置屬華山郡後周屬澄城郡隋屬馮翊
郡唐武德三年割屬西韓州貞觀八年還屬同州五代
梁改屬河中府後唐天成元年復故宋因之金貞祐三
年改屬棧州元初復屬同州明不改

本朝因之 縣城西魏大統三年同州刺史王羆建後圮

明正統十四年重築周八里有奇門四

澄城縣釋名通志本春秋晉徵邑漢置徵縣後魏為澄城縣元和郡縣志徵澄同音後人悞為澄沿革一統志治在府北一百里漢徵縣屬左馮翊後漢廢晉為郃陽縣地後魏太平真君七年置澄城縣兼置澄城郡隋開皇初郡廢以縣屬馮翊郡唐屬同州五代梁改屬河中府後唐同光中復故宋金元明不改

本朝因之縣城通志後魏時建周三里有奇門四

韓城縣釋名通志本周韓侯國雍勝略隋置韓城縣以古韓國為名沿革一統志治在府東北二百二十里本古梁國戰國初魏少梁邑秦置夏陽縣漢屬左馮翊後漢因之晉屬馮翊郡後魏屬華山郡後省入郃陽隋開皇十八年改置韓城縣屬馮翊郡唐武德三年屬西韓州八年徙州治此貞觀八年州廢以縣屬同州天祐二年改名韓原縣五代梁改屬河中府後唐天成元年復曰韓城還屬同州宋因之金貞祐三年升為楨州元至

元二年州廢六年以縣屬同州明不改

本朝因之 縣城通志詩溥彼韓城燕師所完者後無考
唐王勃有登城樓寓望序金大定四年改置楨州修築
之周四里百五十九步門四

華陰縣釋名通志本禹貢華陰地太平寰宇記漢改華
陰以在太華之陰故名沿革一統志治在府南百六十
里戰國魏陰晉邑秦惠文王六年更名寧秦漢高帝八
年改曰華陰屬京兆尹為京輔都尉治後漢建武十五

年改屬宏農郡晉因之後魏屬華山郡隋屬京兆郡唐屬華州垂拱元年改曰仙掌神龍元年復曰華陰上元二年改曰太陰寶應元年復曰華陰五代金元明不改本朝因之同州府志初屬華州雍正十三年改屬同州府縣城本隋唐舊址元至正十八年達魯噶齊托里巴修築明嘉靖四十二年重築周二里九分門三

蒲城縣釋名太平寰宇記以縣東故蒲城為名也或云以縣東有蒲池即小蒲川沿革一統志治在府西八十

里秦置重泉縣漢屬左馮翊後漢因之晉屬馮翊郡後
廢後魏太和十一年置南白水縣屬白水郡西魏改縣
曰蒲城隋屬馮翊郡唐初屬雍州開元四年改曰奉先天
祐三年改屬同州後唐還屬雍州宋建隆中屬同州開
寶四年復曰蒲城天禧四年改屬華州金元明不改

本朝因之同州府志雍正十三年改屬同州府 縣城通
志西魏時建明景泰嘉靖間修周八里有奇門四

白水縣釋名雍大記秦置白水縣以縣臨白水也沿革

一統志治在府西北百三十里漢置粟邑縣屬左馮翊
後漢初廢永元九年復置晉因之後廢後魏太和二年
始置白水縣兼置白水郡隋郡廢以縣屬馮翊郡唐屬
同州五代宋金元明不改

本朝雍正三年屬耀州同州府志十三年改屬同州府

縣城通志相傳唐尉遲恭監築元末兵燹主簿丁華權
移治於南臨川明洪武三年還舊治後屢修築周五里

門四

華州釋名通志州南有少華山東連太華故以取名焉
沿革一統志治在府南百八十里周為鄭國春秋屬晉
戰國為秦魏二國境秦置鄭縣漢屬京兆尹後漢因之
晉屬京兆郡後魏太平真君元年置華州郡孝昌二年
置東雍州西魏始改州曰華州隋開皇三年郡廢大業
二年州廢縣屬京兆郡義寧元年復置華山郡唐武德
初仍曰華州垂拱元年改曰太州神龍元年復故天寶
初改華陰郡乾元初復故上元元年又改太州寶應元

年仍曰華州屬關內道乾寧四年升州為興德府光化三年復曰華州五代因之宋曰華州華陰郡兼鎮潼軍節度屬永興路金屬京兆路元以州治鄭縣省入屬奉元路明屬西安府

本朝雍正三年直隸陝西布政使司同州府志十三年改屬同州府 州城通志唐永泰元年節度使周智光建元至正中拓修明嘉靖乙卯地震城圯重築周七里有奇門四

潼關廳釋名通志潼關因地有潼水後漢設關名明以
名衛

本朝以名縣因關舊名也沿革一統志治在府西北六十
里漢華陰縣地後漢建武中始置潼關明洪武七年設
潼關守禦千戶所屬陝西都司九年置潼關衛屬河南
都司永樂六年改隸中軍都督府

本朝改隸西安府雍正二年裁潼關衛歸併同華等州五
年置縣屬華州同州府志十三年改屬同州府 城垣

通志宋熙寧中侍御史陳洎築明洪武五年重築後屢
修北臨洪河東南跨麒麟山西南跨鳳象二山周一十
七里有奇門六

關中勝蹟圖志卷九

欽定四庫全書

關中勝蹟圖志卷十

陝西巡撫

臣

畢沅撰

名山

同州府商原在大荔縣北二十五里太平寰宇記水經注云洛水南逕商原西俗所謂許原通典馮翊有商原

所謂商顏

謹按馮翊即今府治

雍勝略許原一名高原其地寬平

自蒲城連朝邑界近沮水之澍又名澍原通志許原一

名長虹嶺又名鐵鑱山西盡同州界絕於雒東經朝邑
絕於河延袤八十餘里

沙苑在大荔縣南十二里元和郡縣志一名沙阜東西
八十里南北三十里後魏大統三年周太祖與高歡戰
于沙苑大破之人栽一樹以表其功今樹往往猶存太
平寰宇記唐置沙苑監在馮翊朝邑兩縣界唐末廢周
顯德二年於苑內牧馬在同州南二十五里同州志沙
苑在州南雒渭之間亦名沙海亦名沙澤其中坌起者

曰沙阜東跨朝邑西至渭南南連華州其沙隨風流徙不可耕植唐置沙苑監宋初置牧龍坊今為馬坊里明初為郭駙馬草地產蒺藜果蓏亦佳於他產

已上大荔

華原山在朝邑縣西門外隋書地理志朝邑縣有朝阪水經注洛水東南歷疆梁原俗謂之朝阪同州志華原繞縣西而北以絕於河古河堧也一名朝阪亦謂之華原山又紫陽山接華原西折而入於同州幾二十里蓋

即華原之傑出者

朝邑

梁山雍勝略在郃陽縣西北四十里東西橫亘逶迤最遠望之如屋梁水經注徐水出西北梁山郃陽縣志山上有石室羅漢洞有泉曰天井曰龍泉曰鐔水泉禱雨輒應又有東西峪洽河橋頭河二水出焉山與韓城接界

飛浮山通志在郃陽縣東南四十里一名非山金史地理志郃陽有非山雍勝略山在黃河中俗傳與河水為

升降上有子夏石室

已上
郃陽

將軍山澄城縣志在縣北六十里上有秦武安君白起

廟山南有村曰社田相傳為起食邑居民有白姓者或
其苗裔歟

壺梯山通志在澄城縣西北五十里雲霧集輒雨雍勝
略山有雲門谷谷口若門水氣如雲故名

石門山澄城縣志在縣西北七十五里通志其麓有風
洞一名風谷其深叵測天將風洞中先有聲響振巖谷
風欲息則其響如初

臨高原澄城縣志在縣南五十里宋名臣言行錄李忠

襄公顯忠初仕金知同州以計執金薩拉噶密圖南歸
後由漢村經臨高原奔夏通志原有泉曰龍泉味甘如
醴隋文帝在同州每取致焉

已上
澄城

梁山在韓城縣西北九十里書禹貢治梁及岐詩大雅
奕奕梁山維禹甸之漢書地理志禹貢梁山在左馮翊

夏陽縣西北

謹按夏陽故
城在今縣南

魏土地記山在夏陽縣西臨

於河上水經注河水又南逕梁山原原自山東南出河
晉之望也太平寰宇記大梁山在韓城縣西五里又有

小梁山一稱少梁左傳僖公十五年秦晉戰於韓原雍勝略即所謂少梁也

龍門山在韓城縣東北六十里書禹貢導河積石至於龍門慎子河下龍門其流駛如竹箭駟馬追弗能及尸子龍門未闢呂梁未鑿河出孟門之上漢書地理志龍門山在左馮翊夏陽縣北注顏師古曰龍門山其西在今韓城縣北其東在今蒲州龍門縣北而河從其中流出魏土地記梁山北有龍門山大禹所鑿通孟津河口

廣八十步巖際鐫迹遺功尚存岸上並有祠廟水經注
河水南出龍門口昔大禹導河積石疏決梁山謂此處
也三秦記龍門水懸船而行兩傍有山水陸不通龜魚
集龍門下數千不得上上則為龍括地志龍門山在韓
城縣北五十里此河西之山東與壺口隔水相望三才
圖會禹門禹貢龍門也亦曰禹門渡兩山壁立河出其
中廣百步世謂禹鑿衛氏地圖記龍門山一名葑山形
如筆架又名筆架山上多紫荊又名紫荊山自麓連

嶺約五里自東徂西約十里韓城縣志龍門在韓城東北廣八十步袤九里三分兩岸斷壁狀盡斧鑿高者千仞卑者數十百仞即梁山別麓其南俗呼禹王陵在大河中浮於水面望之如河渚然極衝激不能浸沒人謂與河為消長者非也蓋禹鑿山時巨石墜中流沉凝固結成邱阜耳衛氏地圖記上有觀音洞

在山絕頂相傳霹靂一震山破

崖間觀音及諸羅漢石像自出因就洞築室洞中常有雲氣覆之

玉鏡巖

在山正東白石嶺上凌

霄漢河東百里外一望輒見之

梯子崖

迤素馳嶺西而北羊腸鳥道逕桑園坡老虎嘴又北里許過攢

灘攀崖而上石磴層折謂之梯子崖由龍門登金門由禹閭連金門以至相工坪後之石城率由此道金門餘長四丈餘片石臨河相傳為大禹督工處子堂在門而上六七里又金門之右相工坪廣二丈餘如西岸半山間削壁屹立懸崖橫峙形如帷幔又彷彿梁欂下有石窟廣可五丈高三倍仰攀無際俯臨無地惟鵠鳥累百銛鎡山韓城縣志在縣北七棲息其中十里即龍門西山

大象山名勝志在韓城縣西北二里出西郊即得山麓濂水南旋山勢起伏如象之飲於潭縣志象山南有師嶺山形如師子臨於潭躩踞欲動

蘇山韓城縣志在縣西北五里許有漢蘇武墓故以名

山古徑盤曲而上有老柏三百餘柯皆南向

橫山名勝志在韓城縣西北二十里迤川西北羣峰沓
互宅中邃處為橫山石竒如砌澗底泉聲弄筑振環山
有石洞昔道士赫淨元羽化其中遺書銅碑底為人剽
取其藏書穴丹竈至今俱存

三峽山通志在韓城縣西北四十里水經注橫溪水出
三累山其山層密三成故俗以三累名山山下水際有
二石室蓋隱者故居又踞谷側溪西北皆有石室昔子

夏教西河疑卽此也

牡丹山韓城縣志在縣西北六十里多產牡丹開時紅紫滿山香聞數十里土人采以為薪

五池山韓城縣志在縣西北萬峰中為岑凡五深巖邃谷人跡罕至北池最遠去縣可百二十里西池次之東南池又次之中池稍近亦且八十里俱有泉俗名海眼山多松中池尤勝自麓及巔青蔥夾路幽絕人寰舊志稱為五峙者誤也

高門原通志在韓城縣西南二十里司馬遷自序司馬
靳葬華池孫昌葬高門水經注陶渠水南逕高門南今
高門東去華池三里括地志高門原俗名馬門原韓城
縣志原在芝川西北梁山之麓有層阜秀出雲表已上韓城
車箱谷太平寰宇記在華陰縣西南二十五里一名車
子渦去敷水谷七里深不可測祈雨者以石投之其中
有一鳥飛出應時獲雨

良餘山

一作良餘

太平寰宇記在華陰縣西南三十里山海

經良餘水出良餘山

大敷谷華陰縣志在縣西南三十里一名羅敷谷曰大敷者別於小敷也入谷三十里為相公嶺相近曰天臺山曰竹谷

秦嶺華陰縣志在縣南屬華洛分壤之界西接華州東抵潼關懸崖疊嶂高不可攀行者皆由曲徑

松果山太平寰宇記在華陰縣東南二十七里山海經錢來之山西四十五里曰松果山濩水出焉北流注于

渭水水經注灌水出松果之上即今潼谷水華陰縣志
山通襄鄧之間道上有佛頭崖雲覆其頂輒雨其西曰
水谷又西曰靈谷泥泉水所出也

朝陽山通志在華陰縣東南三十里世傳漢楊震葬時
有大鳥至落翮於此又名留翎巔華陰縣志山勢嵯峨

有大郎廟廟有二泉禱雨多應

己上華陰
謹按關內
名山首稱華嶽位鎮華

陰縣境茲以體質龐鴻岡巒紛錯謹
別錄為一卷其縣內羣山仍載卷內

堯山通志在蒲城縣北三十里水經注一名浮山舊圖

經云堯時洪水為災諸山盡沒惟此山若浮蒲城縣志
堯山有靈應夫人祠池東有粧鑑泉西有龍池泉水清
冷不竭時或愆旱酌其水雩祭則雨山有仙蛻崖金皇
統九年六月大旱邑令馬揚禱於靈應祠雨大霈因增
修之以祠址狹隘命工鑿崖丈餘於堅石中得骸一軀
與石骨相附乃徙置舊崖之上為龕以奉之山南里許
有重山東有紅土坡下為溪頭溪東有嶧山

豐山長安志在蒲城縣西北三十里唐書地理志橋陵

在奉先縣豐山一名蘇愚山

金幟山雍勝略在蒲城縣西北三十里唐書地理志景陵在奉先縣金幟山

金粟山蒲城縣志在縣東北二十五里唐書地理志泰陵在奉先縣金粟山雍勝略唐明皇見金粟山有龍蟠鳳翥之勢復近先塋謂侍臣曰吾千秋萬歲後宜葬此杜甫詩云金粟堆前松柏裏龍媒去盡鳥呼風又山有

碎石如金粟

己上蒲城

秦山通志在白水縣西北五十里東連黃麓西接荆岐山路通廊延環慶有暗門者最為險隘雍勝略小秦山在白水縣相傳自古形勢阻隔不通往來後秦王經此軍不得過王下馬拜山自崩解有路通中部宜君一名馬蘭山隋書地理志白水縣有馬蘭山白水縣志山高八里許西北跨宜君東南跨白水縣之唐寨等村晉元康六年盧水胡反郡尉張光戍馬蘭山即此

黃龍山白水縣志在縣東北六十里盤衍如龍土皆黃

色故名同州志山高五里許跨澄城洛川白水三縣倉
帝陵在其下又東北十里為陽武山相傳為倉聖發靈

之地

已上
白水

少華山雍大記在華州南十四里山海經太華山西八
十里曰小華山水經注華山西南有少華山華州志山
之中峯即少華峯東為獨秀峯一名玉女峯又東為小
敷峪入峪二十三里玉女廟東有金壺峽又十里曰蒼
坪又十里有仙人洞

張三丰與華陽
真人隱居處

其迤北近敷峪口

之峯曰阜頭山

州志在州東南十五里又名半截山亦名復成山宋史五行志天禧五年五月

少華山前阜頭峯越八盤嶺推陷於石子坡東西五里南北十里潰散墳裂踊起堆阜各高數丈長若隄岸

又東為構峪又南四十里至構嶺又三十里即秦嶺也

文獻通考宋太平興國三年華州言秦嶺南石洞自開遣吏馬文則秉炬視之入數十步得丹砂子二百粒獸

形石六構峪口東為鳳谷山華州志一名鳳居山在州東三十里柳子鎮南東漢

辛繕隱此光武徵不至有大鳥高五尺栖繕槐樹旬時

不去宏農太守以聞咸以為鳳三公避位辟繕不起人

因以名山山上有竹泉偃曝餘談開元中有鳳逐二龍

龍化清泉二道鳳憤而死山僧以石函瘞其骨為塔覆

之景泰癸酉石函露出上則刻景祐四年重修啟函鳳

脛骨長二尺圍可六寸股骨長五寸圍如脛骨其潔如

玉語云鳳喜食
龍腦故龍畏之

又東為三甲山又東為方山接華陰境

自少華峰而西為白石峪又西為潭峪

即白龍潭

又西為水

峪又西為鄭南峰

在州西南十里以古鄭縣名

又西為太平峪又西

為飛來峰又西為小山

一名五龍山通志在州南十里山有風穴風出傷稼土人祀之

州志五峯蜿蜒相聚
岩間舊有鎮風塔

又西為石隄峪

在州西南十二里

自南入

峪曰五里泉又五里曰東岐溝又十里曰灰池又六里

為千崖二岔又二里為東西石門又十五里至秦嶺度

嶺十五里曰黑龍潭又五里為青岡坪

在州西南七十五里

又東

南十五里為金堆城又南二十里為五勝溝

接雄南境

自石

隄峪而西為栲栳山又西為赤隄峪

入峪有胡盧潭

峪南二十

五里即秦嶺嶺之南曰桃坪

亦接雄南境

自石隄之西南為

小柿原又南為短嶺自小柿原迤西曰柳村原其北曰

瓜坡自瓜坡而西南曰平原又南曰金堆峪可連秦嶺

南之金堆城自瓜坡而西北有三坌坪其右曰喬峪喬

峪之麓有白龍泉黑龍泉又下曰千頃漫又迤北有原

曰龍王甯有白泉在龍王廟中澄清見底又西南有高

堂嶺下有靈湫嶺以南有李峪又西曰澗峪澗峪之北

曰江村原西曰牛耳峪又西曰龍耳山又西曰箭峪

州在

西南五十里山海經英山西五十二里曰竹山水經注
竹水南出竹山太平寰宇記竹水一名箭谷水州志箭
峪為竹木繁植之區峪下為華
州原峪西為渭南界即古竹山又南為獨孤氏坡接渭

南界

聖山通志在華州西南三十里赤水遵山而北曰聖山
川川以山名也唐書五行志永昌中赤水南岸大山移
東數百步太平寰宇記垂拱四年飛土掩谷為山忽踊

四峰高二百餘丈東西五六里南北七里後立聖山廟於上通志相傳陳搏賣卜於此

喬谷通志在華州西南三十里瓜坡西一名英山山海經石脆山西七十里曰英山水經注禹水出英山太平寰宇記一名王喬谷即王喬隱處俗謂之太公谷

符禺山通志在華州西南四十里龍耳山北山海經小華山之西八十里曰符禺之山水經注符禺山出符禺水太平寰宇記山在鄭縣西南高一百丈華州志山即

今之澗谷

已上
華州

象山潼關衛志在治西南俗名蝎子山山上有田曰黎家坪又稍東為鳳凰山高聳獨峙因以為城又麒麟山在治東南上有古寨有田千餘畝謂之上寨虎踞山通志在潼關東門外盤踞似虎

桃林塞通志在潼關縣東書武成放牛于桃林之野左傳晉侯使詹嘉處瑕守桃林塞杜注在宏農華陰縣東潼關元和郡縣志塞在靈寶以西至潼關皆是地理通

釋自潼關至函谷俱謂之桃林塞潼關衛志自函谷至此幽谷秘邃深林茂木白日成陰又名雲潼關又城東南有牧牛山相傳即武王放牛處

秦嶺通志在潼關縣南嶺以南即雒南界

禁峪潼關衛志在城南三十里谷勢壁立望者禁足因名近雒南界亦功令禁人往來之地廣明初黃巢陷虢州張承範屯潼關關左有谷曰禁坑官軍忘守即此綱目集覽潼之右有禁谷平日禁人往來以權征稅一曰

禁坑亦曰禁溝

潼峪潼關衛志在城南三十里峪口有老君洞水經注
灌水北流經通谷即述征記所謂潼谷也

黃巷阪潼關衛志在城東北黃河南岸其阪隆起下望
關城潘岳西征賦沂黃巷以濟潼水經注河水自潼關
東北流水側有長阪謂之黃巷阪傍絕澗涉此阪以升

潼關

已上
潼關

關中勝蹟圖志卷十

欽定四庫全書

關中勝蹟圖志卷十一

陝西巡撫

臣

畢沅撰

名山

華陰縣華嶽縣志在縣南十里書舜典八月西巡守至
于西岳禹貢西傾朱圉鳥鼠至于太華周禮職方氏豫
州其山鎮曰華山左傳僖公十五年晉賂秦河外列城
五南及華山史記封禪書華山黃帝之所常遊與神會

白虎通華之為言獲也萬物成熟可得獲也風俗通華者華也萬物滋然變華於西方也唐書地理志上元二年改華山曰太山寶應元年復故名括地志華山古文以為惇物洞天記華山名太極總仙之天即少昊為白帝治西嶽上應井宿之精下鎮秦地之分野九域志華山四州之際東北冀東南豫西南梁西北雍十字分之四隅為四州述征記華山從麓至頂升降迂迴凡三十里太平寰宇記華嶽有三峰直上數千仞基廣而峰

峻疊秀迄于嶺表昭文館記上有三峰上接三光中有

石池二十八所上應二十八宿懷蘊金玉蓄藏風雷為

大帝之別宮乃神仙之窟宅也雍勝略以西有少華山

故曰太華登岳者發軔先玉泉

圖書編雲臺觀至玉泉院一里雍勝略玉

泉在張超谷口其水色如漿相傳玉井滲出者因置玉

泉院魏光緒記玉泉院有祠祀希夷先生祠後石洞為

先生睡像左畔有山蔭亭隴蜀餘間山蔭亭

踞盤石上玉泉環流有樹四株名無憂樹出玉泉院

東南上為谷口

水經注從北南入谷七里又屈一祠謂之石養父母石龕木主存焉范守己記

兩壁直立如削高千仞谷底濶不盈尺寬者或二三尋谷流轉折隨山約五里許至五里關圖

編自玉泉院至闕五里范守已記巨石突塞谷口
為石門人佝僂上若隧道然額曰通天第一門
桃林

坪圖書編在張超谷楊嗣昌記五里關南後漢書張楷
五里關上張超谷傳華陰山南有公超市性好道術

能作五里霧華岳圖一名仙谷以張超結廬改名今石
室依然峯麓名勝記一稱張超霧市谷內有卧仙坪內

石室為蛻骨所樵牧戲石羊城初平叱石化羊處與兄
其間有飛石來塞其穴

初起俱仙隱於算塲蘆花池雅勝略在張超谷中述異
此又名仙谷記後魏道士寇謙之洞曉

渾天儀曾定天元五紀後隨成公興去壺公石室峯麓
棄其餘算籌化為葭荻即成蘆花池名勝

記在岳西北孤峯上石室可容十餘人有泉東北入霧
市谷東谷中即寇謙之算塲西谷中即修羊公石榻

希夷峽都穆記第一關四里至方洞洞口斗崖百尺名
希夷峽其上類穴乃其蛻骨所舊有垂鑠可攀

以上見骨盛木函色微紅香甚有人竊趾骨以去道士憤之斷其鏤自是人不得上范守己記嘉靖末姚直指

一元遷葬于祠內香積下謹按第二關都穆記希夷希夷蛻骨于明李復遷瘞峽中

步為第二關大石車箱潭雍勝略在仙谷內十里水府記華山車箱潭乃第七水府

也通志宋仁宗歲遣使投玉甕谷通志在華山西谷口簡于此崇寧二年封豐潤侯

道桃谷通志在華山西入谷牛心谷通志在華山東即

峯麓名勝記其地多槐稱楊文仙谷通志在華山東藏

震槐市山間多五色驚鳥

馬谷雍勝略在華山東漢武帝求仙有神馬自華山出不見尋之在此谷石龕下故又名藏馬龕東北澗

中石上馬黃神谷通志與藏馬谷相近真人黃蘆子隱跡尚存居處華陰縣志內有黃龍潭旱則禱

馬宋封**娑羅坪**都穆記第二關行三里至娑羅坪土曠

廣潤侯壁可數十丈鳴瀑掛壁而下范守已記山至是兩壁各

縮約十餘丈谷澗寬平如几有遊者過此祈禱外有娑

羅樹**上方峰**楊嗣昌記娑羅坪東對小上方又上為大

一本**上方峰**上方華岳圖洞天坪即娑羅坪其東絕

為上方峯突面攀鑱險不可視非登岳要路雍勝略上

方白雲宮中方太清宮下方雲臺宮皆在娑羅坪東峯

上因羽人**甕肚峯**通志在華山中方上又有駕鶴軒在

焦道廣建**甕肚峯**中方半路唐開元記山突起如半甕

明皇嘉其高迴欲于峯腹大鑿開元二**西元門**王履記

宇填以白石令百餘里皆見因諫乃止**西元門**上方峯

攀鑱盡處有石罅號西元門此峯唐金仙公主駕鶴昇

仙處門則元宗覓金仙而鑿者也十大洞天記華山西

元洞周迴三十里名極**八仙洞**都穆記在娑羅

真洞天乃長春之境**八仙洞**坪西險不可上**繫馬峯**

三才圖會娑羅坪北十八盤三才圖會踰娑羅坪至十
望山頭有石如柱
折楊嗣昌記坪之上為盤最下三盤曰斗三
盤逆十八盤而上孤峯錯落山猶左右截也
編自希夷峽至此十里雍勝略在十八盤之上有青柯
館遊者至此合與易裴王履記至此山恰半入山來悉
崎嶇側塞夷者惟此楊嗣昌記坪在西
峯下迴塗曲磴浮蒼點黛密如柯葉
寥陽洞都穆記
右范守已記洞旁架木
為祠迤北皆石崖壁立
北斗坪華岳圖青柯坪西有峯
女拜斗得仙之地謹按升岳塗徑自谷口至娑羅坪
尚屬山麓地多幽壑曲澗上至青柯坪通計得二十里
當山之半登陟者可肩輿以達凡上方以下諸峰皆環
繞於坪之左右者也至迴心石始攀鐵索以行至者畏
險輒還故
曰迴心也

回心石

圖書編青柯坪左上里許喬宇記路皆斜削絕壁攀鐵索至此始

十尺

童國書

柯坪東上三里許水經注南至天井

傾曲而上可高六丈餘上者皆所由涉更無別路欲出

井望空視明如在室窺牕也

范守己記一峯直立劃焉

中崩如鋸曳痕左偃右覆人自壁中行濶尺許高百餘

尋

百尺

峽圖書編在嶮上東北轉一里許水經注東上

峯如前而叙壁益狹兩腋摩壁石以行上有塊石撐之

若恐其復合者吳同春記峽頂有巨石如雲名雲頭石

二仙橋

喬宇記百尺峽東北行二里許面崖執鐮足踏

為俯渭崖西為車箱崖

媼神洞通志在二仙橋上洞內

崖如車箱人緣輪以行

恭懸

老君犁溝

范守己記百尺峽上五里許石

壁插天若剝若削水雷一道自

王祖仁皇帝

賜抱真二字扁額

真二字扁額

老君犁溝

上而下直若引繩深若發耜李之椿記犁險於嶂嶂暗而犁夾三才圖會一云離垢謂老君登華離却塵垢云

胡孫愁

喬宇記自仙人橋東北行里許攀行六十步曰胡孫愁三才圖會崖僻奇峭上有鐵援攀踞崖

畔

雲臺峰

圖書編犁溝又行四里雍勝略兩峰崢嶸四面懸絕上冠景雲下通地脉巍然獨秀有若

雲臺下有穴昔人入此東去云經黃河底上聞流水聲

峯側有長春石室峯麓名勝記貞觀中有道士杜懷謙

居此自號

玉女

牕來麓名勝記在雲臺南峯上有石門

長春先生

星玉女之

神土巖

雍勝略在雲臺峰東南百步周武帝時道士焦道廣居雲臺峰帝親問道

列館也

因於谷口置雲臺觀道廣欲構房廊精思所感石上湧

出神土用盡復生于今尚然又仙油湏峯麓名勝記在

雲臺峰壁中焦道廣每設醮天降

油於此後道廣來麟去油不復生

試鑿穴

峯麓名勝記在雲臺北峰

北面高百丈深不可測穴邊一公主峰述異記與雲臺峰相近漢南陽

石如鑿布夾先生城骨所也

公主避林亂入山得寶谷通志在華山東即王遙隱居處谷中有王刁三洞雅勝略

仙尚育朱履遺跡

仙人王遙刁自然登仙處上洞莫能到中洞有飛石逸

洞門下洞隱居者皆在其中相近有碧雲洞峯麓名勝

記下為碧雲溪宋有鄭雲叟崔士端白雲峯峯麓名勝記在岳東

鄭明處羅隱之居此時稱四高士居

北唐金仙公主修行之所名曰白羊峰雅勝略在岳西北五里層崖晃

白雲宮宮側有焦真人石洞

朗洞石空濛昔有人隱此莫知姓名常乘白羊往來因

以名峯每至三元八節及諸齋日即有神燈或三或五

見於焦公崖峯麓名勝記焦公崖在岳東南真人焦孝

崖壁

中單

余卧

毛女峯雅勝略在岳西秦時宮人字玉姜入山隱此峯上食柏飲水體生綠毛人常見之有

毛女洞洞中猶聞鼓琴之聲其西為太極總仙洞下有車箱潭三十六小洞天記第三西岳華山洞周迴三百

里名總擦耳崖吳同春記自犁溝東轉至崖路僅容趾下臨絕壑行則崖石擦耳仙人

碕范守已記自雲臺折而南行三里許吳同春記崖如鑿塊挽鑲而上百餘步名上天梯有赤白二圓形崖

下為金天洞循崖西南御道范守已記過仙人碕行亂石上一石若蓮屏直立循

屏而度又一石稍濶為坊其上曰升嶽御道峯麓名勝記漢武帝唐元宗曾由此因名今兩旁有石曰乃當時

栽闌纏錦以遮危險者御道之右有白鹿龕漢武蒼龍

內傳魯生女乘白鹿從王母而去故曰白鹿龕嶺圖書編自日月崖轉西南行三里許是為山脊水經

注至胡越寺神像有童子之容從祠南歷夾嶺廣栽三尺餘兩箱崖數萬仞窺不見底祀祠有感則雲與之平然後敢度猶須騎嶺抽身漸以就進故世謂斯嶺為

欽定四庫全書

卷十一

擲巖王履記巖凡兩折中隆旁殺如背色正黑楊嗣昌
記古無闌砌今可平視其上石級合數之得二百四十
有六說鈴巖盡為龍口胃一鷄子翻身圖書編過蒼龍
大石有鏡曰韓退之投書所鷄子翻身巖又上行一里
許至其巖路忽絕由八公龕范形弧記度蒼龍巖復循
崖下鑿折身反度高崖下黃上黑有水泉積
雪樹最古者上馬石范守己記石巖如馬脊自東踰石
曰將軍樹而西若駟馬狀石兩旁如削過石
復有一石亘跨巖際為單人橋橋南銜石背而宗土地
上為通天門唐杜甫詩箭括通天有一門即此
祠三才圖會趙雲山崖有宗土地祠謂華為羣山之宗
祠也說鈴華岳有三麓首谷口次青柯坪次宗土地祠
譚紫霄馬丹陽劉海蟾邱長春修煉之所細辛坪勝
略在頂之西南隅方圓三四畝盡是細辛坪東過溪口
登巨石上有鐵坊曰太極東元門又自坪西行百餘步

有洞曰
朝陽

玉女峯

華岳圖在東峯右同趾而異巘昔有人見玉女乘白馬入峯間集仙錄明星玉女居華山服玉

漿白日上昇許孚遠記玉女偃伏東峯之內若閨閣間玉女殿在峯頂雪壁燦日范守已記有巨室若龜狀背

上疊石為玉女祠三才圖會龜腹刻醴泉峯麓名勝記為石室舊有楊妓師事韓姑于此

水微有酒香玉女洗頭盆范守已記祠前度石梁而南為國之瑞

有坎可容五斗水雍勝略祠前有五石白水紺碧澄澈不乾不溢又有玉女石馬甚靈異常夜聞嘶噉之聲三

才圖會洗頭盆前石裂可五尺以石投之食頃猶有聲或云下通黃河范守已記石北泐可五寸其深不測是

為唐人

進簡處

大邑曰

人

東峯

有三山志朝陽峯也說鈴東峯

三茅洞

三才圖會東

洞前為小殿殿左

仙掌崖

雍勝略在東峯東北西京賦

有崖當東峯盡處綴以二華巨靈鼎高掌遠

蹠以流河曲西征賦眺華岳之陰崖睹仙掌之遺跡水

經注華岳本一山當河河水過而曲行河神巨靈手盪

脚蹠開而為兩今掌足之跡仍存王涯仙掌辨峯有五

崖比壑破崖而列自下遠望偶為掌形三才圖會崖壁

黑色膏白壘中流出隨膏凝結黃白相間遠望之見

其大者五岐如指名山記上有石月半輪光可鑑

叔卿博臺

雍勝略在岳頂東南隅別一孤峯遙望有方

華山以節柏之心為博箭長八尺基長八寸而勒之曰

王與天神博於此范守已記東峯南下有小峰平頂當

岳之胸上有鐵瓦亭一區鐵碁一杆為衛叔卿圍碁處

路由懸崖鐵鑲直絕約十餘丈鑲盡蹠崖自度崎嶇九

折乃至

石樓峯

名山記高於玉女其東壁則為仙人掌
謹按宗土地祠在三峯口已抵玉女

峯下自玉女西麓西南去三里許至細辛坪有溪直界
乃東峯與西南二峯分界處升岳者度溪至東元門必
先登玉女故以東峯次玉女後而玉女祠
諸勝則附玉女三茅洞諸勝則附東峯也

西峯即蓮花峰

雍勝略一曰芙蓉峯昭文館記蓮花峰
為太上山迴巒四合三峰崢嶸上廣十

里名小山記從雲臺望東西二峰上分下合若並蒂蓮花
南峰藏其間如蓮房說鈴西峰有三石樓在前老君爐
在後石樓峯與東峯石樓相對乃白帝建鐘鼓之所頂
有巨靈足跡范守已記跡長三尺許深一寸許儼然踵
跡
神香子斧劈石 范守已記長十數丈浮置峰頂斷而
痕 為三其北若夾壁上有覆石其下若
門才可容人石西下臨深壑五
千仞石東亦陡削直至谿底

玉井

雍勝略在蓮花峯
傍三才圖會深可

十丈圓徑半之楊嗣昌記玉井涓涓異
常泉左方為鎮岳宮右上即南峰路

二十八宿潭

華岳

圖在玉井旁三才圖會峰之下有石窪如白凡二十有
八上應列宿自北而南如貫珠自崖端下挂山腹水簾

洞淺之頂又有石仙人水簾洞
雍勝略在岳北面半腹
八卦池太乙池
中登真隱訣洞深三百

里中有瑤臺玉室石髓金精遙望方圓可丈許鳥道絕

通時出異色雲氣洞口上有丹石間青石似丹青畫出

仙人之狀冠帔衣服無不周備號曰石仙人范彤弧記

洞在西峰之腰正臨峭壁諺曰老君臍玉井出西峰滙

二十八潭奔注兩峰間懸瀑數十仞至洞口下有丹石

承之倒灌入洞伏而不見至青柯坪于石隙中如珠簾

散布而出流行成澗出谷口入渭岳有四洞
洞元石室

東曰昭陽西曰西元南曰正陽北曰水簾

峯麓名勝記在頂之西北峰上東西有二門初才容身

側入至室中周迴五六丈有石道君像高三丈名山記

一名裴君石室真人裴君入石室精思
至道積二十三年降五龍元老之所
屈嶺水經注自

出四百五十步有屈嶺說鈴西峰有一臂詰曲如蒼
龍嶺廣倍之名曰屈嶺度嶺經巨壑四五乃至南峰老

君煉丹爐李之椿記在蓮花峯北三才圖會鑪徑大餘
高可六尺謹按玉井白蓮自古著稱有谿

自玉井東至玉女峰北注乃西峰與南峰分界處南峰
獨高西峰最奇其三峰統稱蓮花實由西峰得名也凡

玉井諸勝俱
附西峰之後

南峯即落雁峯唐語林李白登華山落雁峯曰此山最
高呼吸之氣想通帝座恨不攜謝朓驚

人語來搔首問青天耳尹仲記即縣中所見如冠形者
中峯隱約與東西峰相對南峰為西峰所障踞松檜峰
始識其面絕其巔而後見東西峰之在下也魏光緒記
南峰五歧並起中為落雁峯東松檜峰又東為賀老石

室西則老君丹
驢又西為寶旭

黑龍潭

峯麓名勝記在南峰上旱禱必
應宋熙寧二年封顯潤侯王履

記潭有三深淺不等深者不過二三尺雖大旱不
涸說鈴龍在則水黑去則水清華之頂門水也

葛蒲

池

雍勝略在太上泉旁池有葛蒲一寸九節水經注屈
山頂上方七里靈泉二所一名蒲池西流注于澗一

名太上泉東注澗下楊嗣昌記太上
泉水清涼作瑟瑟光俗謂之仰天池

老君洞

峯麓名勝
記在頂之

東南

朝元洞

王履記南峰南面迎陽洞上為雷神洞復
右折為朝元洞上下辟削鏡壁成壑壺石

置闕窳石以入深可四丈廣近之高又
倍焉純白如雪昔賀老營此四十年

賀老避靜處

才三

圖會朝元洞之下有賀老石室室憑突崖煬竈猶在吳
同春記從朝元洞垂雙鐐下總鐐盡以鐵杙插壁承以

狹版鐐當人膺行則面壁舒臂緣鐐以足橫移洞額即
全真巖說鈴長空棧在壁半廣八寸長數十丈背空虛

行棧畫得賀老室
俯臨之可千仞

全真崖

三才圖會在靜室旁有崖高
十餘丈遙覆其室朱書全真

崖三字各大仞許
非御虛者不能成

避詔崖

范守已記由峯頂東南下為
避詔崖李之椿記崖形覆前

縮後約數十丈華岳圖希夷表云九重寵詔休教升鳳
御來一片野心已被白雲留住因此名崖有希夷手

書避詔

三公山

峯麓名勝記在岳東南三峰森秀上象
三台魏光緒記南峰背臨絕壁外更

為三峯名三公山高與前埒兩

燕公石室

峯麓名勝記
在三公山漢

畔千峰林立若青蓮瓣之擁護

楊嗣昌記在三公山稍西

明帝時有燕子微隱

三鳳山

山頂各一石起立如危闌

相倚環三峯者層巒細皺如千葉寶蓮謹按三公三
鳳諸山在南峰之南大壑外其神靈勝蹟俱在岳北蓋

岳體北向南其背也南峰最峻東西二峰僅及其半升
岳者必登南峰而極凡黑龍潭諸勝俱附南峰之後唐

杜甫封西岳賦并序上既封泰山之後三十年間車轍馬跡至於太原遷於長安時或謁太廟祭南郊每歲孟冬巡幸溫泉而已聖主以為王者之禮告厥成功止於岱宗可矣故不肯到崆峒訪具茨驅八駿於崑崙親射蛟於江水始為天子之能事壯觀馬爾況行在供給蕭然煩費或至作歌有慚於從官誅求生殺於長吏甚非主上執元祖醇醲之道端拱御蒼生之意大哉聖哲垂萬代則蓋上古之君皆用此也然臣甫愚竊以古者疆場有常處贊見有常儀則備乎玉帛而財不匱乏矣動乎車輿而人不愁痛矣雖東岳五岳之長足以勒崇垂鴻與山石無極伊太華最為難上至於封禪之事獨軒轅氏得之夫七十二君罕能兼之矣其餘或蹶踣風雲碑版祠廟終么麼不足追數今聖主功格軒轅氏業纂七十君風雨所及日月所照莫不砥礪華近甸也其可惡乎比歲鴻生巨儒之徒誦古史引時義云國家土德與黃帝合主上奉命與金天合而守闕者亦百數天子

寢不報蓋謙如也頃或詔厥郡國掃除層巔雖翠蓋可
薄乎蒼穹而銀字未藏於金氣臣甫誠薄劣不勝區區
吟咏之極故作封西岳賦以勸賦之義預述上將展禮
封柴者實觀聖意因有感動焉為其詞曰惟時孟冬百
工乃休上將陟西岳覽八荒御白帝之都見金天之王
既刊石乎岱宗又合符乎軒皇茲事體大越不可載已
先是禮官草具其儀各有典司俯協吉日欽若神祇而
十乘萬騎已雙略怡儼屈駑陸離唯君所之然後拔翠
鳳之駕開日月之旗植鳴鐘發雷輜辦格澤之修竿決
河漢之淋漓彌天狼之威弧墜魍魎之霏霏赤松前驅
彭祖後馳方明夾轂昌寓侍衣山靈秉鉞而踉蹌海若
護蹕而參差風馭丹以縱雙雲螭緩而遲跼地軸軋軋
殷以下折原隰草木儼而東飛岐梁閑倏涇渭反覆而
天府載萬侯之玉尚方具左纛黃屋已焜煌於山足矣
乘輿尚鳴鑾輿儲精澹慮華蓋之大角低回北斗之七
星皆去屆蒼山而信宿屯絕壁之清曙既臻夫陰宮屏

象碑兀戈鋌憲宰飄蕭蕭洵如也於是太乙抱式
元冥司直天子乃宿被齋就登陟駢素虬起崩芳天語
秘而不可知代欲聞而不可得柴燎上達神光充塞泥
金乎茁茁之南刻石乎清冥之北上意由是茫然延降
天老與之相識問太微之所居稽上帝之遺則颯弭節
以徘徊撫八紘而賦黑忽風翻而景倒澹殊狀而異色
同若褰祛開帷下辯宸極者久之雲氣蔚以迴復山嘯
葉而未息祀事孔明有嚴有翼神保是格時萬時億爾
乃駐飛龍之秋秋詔王屬以中休觀羣后於高掌之下
張大樂於洪河之洲芬樹羽林莽不可收千人舞萬人
謳麒麟跋跋而在郊鳳凰尉跋而來遊雷公發鼓而揮
汗地祇被震而悲愁樂師拊石而具發激越乎遐陬羣
山為之相峽萬穴為之倒流又不可得載已久而景移
樂閣上悠然垂思曰嗟乎余昔歲封泰山禪梁父以為
王者成功已纂終古嘗鑒前史至於周穆漢武豫遊寒
閭亦所不取惟此西岳作鎮三輔非無意乎頃者猶恐

百姓不足人所疾苦未暇瘞斯玉帛考乃鐘鼓是以視
岳於諸侯錫神以茅土豈惟壯設險於甸服報西成之
農庖亦所以感一念之精靈答應時之風雨者矣今茲
豕宰庶尹醇儒碩士僉曰黃帝顓頊乘龍遊乎四海發
軻匝乎六合竹帛有云得非古之聖君而秦華最為難
上故封禪之事鬱沒罕聞以余在位發祥隲祉者焉可
勝紀而不得已遂建翠華之旗用塞雲臺之議矧乎殊
方奔走萬國皆至元元從助清廟獻欽也臣甫舞手蹈
足曰大哉燦乎真天子之表奉天為子者矣不然何數
千萬載獨繼軒轅氏之美彼七十二君又曷能臻此蓋
知明主聖固不克正功固不克成放百靈歸華清元宗
迹經華岳詩飭駕去京邑鳴鑾指洛川循迹經太華迴
蹕暫周旋翠嶽留斜影懸崖凝夕烟四川皆石壁五位
配金天彷彿看高掌依稀聽子先終當銘歲月從此寄
靈仙蘇頌奉和聖製迹經華岳應制詩朝望蓮花岳神
心就日來晴觀五千仞仙掌拓山開受命金符叶過祥玉

欽定四庫全書

卷十一

瑞陪霧披乘鹿見雲起馭龍回偃樹枝封雪殘碑石冒
苔聖皇惟道契文字勒巖隈張說奉和聖製述經華岳
應制詩西岳鎮皇京中峰入太清玉鑒重嶺應綈騎薄
雲迎霽日懸高掌寒空類削成軒遊會神處漢幸望仙
情舊廟青林古新碑綠字生羣臣願封岱還駕勒鴻名
沈佺期辛丑歲十月上幸長安時扈從出西岳作西鎮
何穹崇壯哉信靈造諸嶺皆峻秀中峯特美好傍見巨
掌存勢如石東倒頗聞首陽去開圻此河道磅礴壓洪
源巍哉壯清昊雲泉紛亂瀑天磴屹橫抱子先呼其巔
宮女世不老下有府君廟歷載傳灑掃星明應天遊十
月戒豐鎬微末忝間從兼得事蘋藻宿心愛茲山意欲
拾靈草陰堅已永闕雲竇絕探討芳月期再來迴策思
方浩祖詠觀華岳詩西入秦關口南瞻驛路連彩雲生
闕下松樹到祠邊作鎮當官道雄都俯大川蓮峰徑上
處彷彿有神仙王維華岳詩西岳出浮雲積雪在太清
連天凝黛色百里遙青冥白日為之寒森沈華陰城昔

開乾坤開造化生巨靈右足踏方止左手推削成天地
忽開拆大河注東溟遂為西峙岳雄雄鎮秦京大君包
覆載至德被羣生上帝佇昭告金天思奉迎人祇望幸
久何獨禪云亭杜甫望岳詩西岳峻嶒竦處尊諸峰羅
列似兒孫安得仙人九節杖拄到玉女洗頭盆車箱入
谷無歸路箭括通天有一門稍待西風涼冷後高尋白
帝問真源李白西岳雲臺歌送丹邱子西岳崢嶸何壯
哉黃河如綵天際來黃河萬里觸山動盤渦穀轉秦地
雷榮光休氣紛五采千年一清聖人在巨靈咆哮擘兩
山洪波噴箭射東海三峰却立如欲摧翠崖丹谷高掌
開白帝金精運元氣石作蓮花雲作臺雲臺閣道連窈
冥中有不死丹邱生明星玉女備洒掃麻姑搔背指爪
輕我皇手把天地戶丹邱談天與人語九重出入生光
輝東來蓬萊復西歸玉漿倘惠故人飲騎二茅龍上天
飛韓愈古意詩太華峯頭玉井蓮花開十丈藕如船冷
比霜雪甘比蜜一片入口沈痾痊我欲求之不憚遠青

壁無路難黃緣安得長梯
上摘實下種七澤根株連

臣

謹按唐一行云天下山河之象存乎兩戒北戒自
積石終南負地絡之陰而東及太華南戒自岷山岷
冢負地絡之陽而東及太華河自北戒之首循雍州
北徼以達華陰江自南戒之首循梁州南徼以達華
陽是太華者兩戒山河之會也周禮職方尊為西嶽
祭視三公漢樊毅謂其能通精氣興雲雨又用昭明
百穀繁殖黎民時雍是以軒帝遊焉以會衆神虞帝

柴焉以覲羣后爰自夏氏以迄我

朝世歷四千秩祀罔替乾隆辛卯之歲

臣

恭膺

簡命備位闕中抵華陰境祇謁

嶽祠申禋展事計今五稔以來仰蒙

皇上宵衣旰食敬

天勤民

蒼祇合符

嶽靈効職雨暘時若年穀順成百物無疵厲天札維時以

兩金川小醜未靖徵輸旁午未獲親陟三峰以章美
報歲乙未秋八月西師告捷大凱將還以東路郵程
待需察眎遂由省城啟行途經臨潼渭南華州各邑
時維九月秋稼登場但社期已過農民尚未俶事春
田待澤孔殷因念華嶽距中土西偏七宮正位少陽
用事萬物生華自古在昔報賽禱祈咸在於是因率
領縣令致齋簡從躡屩登山宿半山之媼神洞次日
得至落雁峯頂上有

金天宮為康熙四十二年癸未

聖祖仁皇帝

翠華西幸

勅發帑金修建

御題露凝仙掌四字恭懸正殿

奎文炳燦巖壑增輝因領縣令恭禮

嶽靈虔誠祈禱即時甘霖大沛連三晝夜徧數千里報謝

下山啟程回省

臣

以職司守土幸際

昌期心切康年情殷請

命仰蒙

聖恩俯鑒微忱

特頒

御書嶽蓮靈澍殿額

臣

恭率寮案跪迎至署被飾厥文敬上

金天宮殿

兩朝奎畫輝映後先麗並三辰光增羣岳天人之事盛矣神祇
之望允塞猗歟休哉曠古所希遇也至於嶽之大體


山海經云太華之山削成而四方其高五千仞其廣
十里此蓋指蓮花玉女落雁三峰而言實則五峰歧
出南為落雁西為蓮花東為玉女北為雲臺中則香
鑪峰也由谷口以至娑羅坪尚屬山麓上至青柯坪
計程得二十里青柯坪至蒼龍嶺得二十里蒼龍嶺
至落雁峯頂得二十里然他山迤行此則直上故其
峻絕數覺倍之青柯坪以下皆由北峯取道過媪神
洞則轉至中峰至三峰口始蒞東西兩峰之趾登東

西峰始見南峰之趾名為三峯實則前屏後障左龍
右沙蟠天際地各自為高者甚衆不同他山一大大
峰外餘皆崿嶮然大峰雖多實以三峯為之主餘皆
環拱擁衛不同他山之參差雜插漫無主峰譬如大
將之統列帥牧伯之總羣侯有綱有紀不僭不忒分
之各自為雄合之共成其大秦地名山甲於天下而
此獨尊之為岳良有以也至岳之奇莫過於千尺嶂
險莫過於蒼龍嶺其餘大奇則大險小奇則小險蝸

旋而上援挂而下隨足所到皆非心神意計所及上
至三峰之頂自為天地日月星斗幾可平視風雲雷
雨皆在下方出沒隱見光晶掩鬱與人間經見景象
迥異俯視下界近則秦嶺少華遠則終南太白往時
所見以為渺若霄漢者皆如兒孫帖帖肘腋却顧此
身虛空飄蕩渺如黍粟儻忽惝怳幾無見聞所謂御
六氣之辨以至無窮升崑崙而排閭闔其視下也亦
若是而已矣

臣仰蒙

聖恩具位西陲際斯嘉會忭欣感戰莫可名言謹識大凡卷
末以志慶幸云



關中勝蹟圖志卷十一

欽定四庫全書

史部

關中勝蹟圖志卷十二至十六

詳校官太僕寺少卿_臣李廷欽

編修_臣程嘉謨覆勘

總校官進士_臣朱鈐

校對官助教_臣胡予襄

謄錄監生_臣呂沛傳

欽定四庫全書

關中勝蹟圖志卷十二

陝西巡撫

臣

畢沅撰

大川

附水利

同州府洛水在同州府城西南五里自澄城蒲城界來南逕商原又逕大荔縣南沙苑北又東至霸城村入朝邑界山海經白於之山洛水出於其陽而東流注於渭周禮職方氏雍州其浸渭洛詩小雅瞻彼洛矣維水泱

決

謹按雍州之洛鄭康成注出懷德賈疏即詩云瞻彼洛矣者也與禹貢導洛自熊耳者別

水經注

渭水又東逕華陰縣北洛水入焉詩地理考洛水出洛

源縣白於山東流至邠州洛交縣又東南流至京兆府

雲陽縣東又逕同州澄城西北去富平之懷德亦近

謹按

洛源今屬安化洛交今屬邠州雲陽今屬淳化懷德今屬富平

禹貢錐指洛水自逕朝

邑縣西之朝阪又南自趙渡鎮歷華陰縣西北葫蘆灘

入渭明成化中洛水改流東過鎮南徑趨于河不復至

華陰入渭矣

渭水在同州府城南三十五里自渭南華州界流入又東入朝邑華陰界水經注渭水東經平舒城北水之陽即懷德縣界

謹按平舒城今屬華陰漢懷德縣今屬朝邑詳見西安

九龍泉在同州府城南八里沙苑太平寰宇記泉有九穴同為一注因名九龍今為鵝鴨池通志九泉同流州所由得名也鍾而為池廣袤五頃今漸堙廢

已上大荔

黃河在朝邑縣東七里自郃陽界流入與山西蒲州接界又南入華陰界書禹貢導河積石至于龍門南至于

華陰孔安國傳雍州東據河龍門之河在冀州西孔穎

達正義河從積石北行又東乃南行至于龍門計應三

千餘里水經注河水又南逕西河囿陽縣東

謹按即今神木縣

又南逕離石縣西

謹按即今永寧州

又南過土軍縣西

謹按即今石樓

縣

又南過上郡高奴縣東

謹按即今膚施縣

又南過河東北屈

縣西

謹按即今山西平陽府吉州

有孟門山又南過皮氏縣西

謹按即今

山西絳州河津縣

又南出龍門口又南逕梁山原東

謹按原在今韓城縣

又南過汾陰縣西

謹按即今山西蒲州府榮河縣

又逕邵陽城東又南

逕陶城西

謹按即今山西蒲州府臨晉縣

又南過蒲坂縣西

謹按即今山西蒲州

又南逕雷首山西又南至華陰潼關厯船司空

謹按船司空故

城通典在華陰縣東北五十里

與渭水會雍勝略黃河自龍門而來厯

韓城郃陽經本縣臨晉關轉經潼關界同州府志黃河

舊自郃陽入朝邑東境南至大慶關東濱蒲州城故曰

蒲津禹貢所謂西河也南至金龍渡為河與洛渭交滙

之處世稱三河口去朝邑縣東南三十里朝邑縣志自

明成化中洛水崩於河河之害十倍於前隆慶三年浸

縣東門萬歷六年浸太陽諸聚落七年越大慶關浸浮
西出喬家灘三徙兩陽村浸其半至十二年三河口亦
在洪流中矣

洽水今名金水河在朝邑縣北五十里自郃陽界南流
六十餘里入縣界又東流逕澇峪鎮入於河

洛水在朝邑縣南五里自大荔縣界流入又東南入河
朝邑縣志洛水舊流自縣南之趙渡鎮逕華陰西北葫
蘆灘入渭明成化中洛水改流東過趙渡鎮南徑趨于

河不復入渭矣

渭水通志在朝邑縣南四十里自同州界來又東至華陰界入河水經注渭水又東逕長城北又東至華陰界苦泉元和郡縣志在朝邑縣西北三十里其水鹹苦羊飲之肥今於泉側置羊牧故諺云苦泉羊洛水漿

已上朝邑

黃河邵陽縣志在縣東四十里自韓城界流入與山西臨晉縣分界又南入朝邑界水經注河水南過汾陰縣西又逕邵陽城東又南漢水入焉又南逕陶城西

謹按陶城

欽定四庫全書

卷十二

今屬山西
臨晉縣

徐水通志在邵陽縣北十五里水經注徐水出西北梁山東南流逕漢武登仙宮東又東南逕子夏陵北東入河一名橋頭河邵陽縣志橋頭河源出梁山東峪逕城東北入河順治中邑人引水西流環城而東如圍帶又名腰帶水泠水通志在邵陽縣西北三十里又東南入朝邑界詩大雅在泠之陽朱子集傳泠水名在今同州邵陽縣今流已絕故去水而加邑水經注城北有北漢水

又城南側中有漢水河南又有漢水即冷水也並注於河太平寰宇記漢水總發源西河西岸平地雍勝略洽河源出梁山西峪東流注於黃河漢永平間流絕今有乾河村其後復流邑人重之呼為金水縣志縣有王村漢鯉漢東鯉漢渤地漢夏陽漢去河數武湧出地尺許清冽迥異

陽涇湫邵陽縣志在縣東南五十里即剗首水左傳文公七年秦敗晉於令狐至於剗首一名剗谷水唐書地

理志邵陽縣陽班湫貞元四年堰滂谷水成朝邑縣志

朝邑縣東北有剗谷鎮以近剗谷口而名

已上
邵陽

洛水禹貢錐指在澄城縣西二十里自白水界來又東南入蒲城界漢書溝洫志武帝時穿渠自徵引洛水至商顏下顏師古注洛即漆沮徵即澄城也

長寧河在澄城縣西北四十里通志以流逕長寧城故名西南流入于洛一名三娘子川縣志源出宜君界麻林坡會雲門紅羅二水又有陰泉水在縣西北三十里

泉自崖陰出味甘冽並入長寧河

酒泉通志在澄城縣西北四十里左傳王巡虢守虢公
為王宮於珽王與之酒泉杜預注酒泉周邑今同州有
甘泉出匱谷造酒尤美縣志一名甘泉俗名縣西河會
縣西諸泉入于洛又隋公泉在縣西北三里許其水清
澈可愛東南流入甘泉水

澄泉雍勝略在澄城縣西三里縣以此名源出大慶里
西莊澗中雍大記源潔流清會甘泉入洛又名官泉

大峪河澄城縣志在縣東二十里源出界頭山與邵陽

分界至蒲城入洛亦名撲地河

已上
登城

黃河通志在韓城縣東十五里自宜川界流入與山西
河津滎河分界又南入邵陽界水經注河水南出龍門
口又南右合暢谷水又南逕梁山原東又南踰谷水注
之又南右合陶渠水昔魏文侯與吳起浮河而下美山
河之固即於此也縣志河自龍門而南距邵陽不百里
河堧多容土遇潦輒潰與滎河縣接界即韓信以木罌

渡軍擊魏處

治戶川通志在韓城縣東北七十里龍門山北有河口
略似龍門而不能通相傳鯨治水時所鑿今名錯開河
衛氏地圖記錯開河由龍門而上六七里曰金門其西
有澗曰治戶川川口頗多鐫跡在昔金門未闢崇伯不
諳水性意欲使河直行東北故失利耳書曰鯨湮洪水
疑卽謂此也

暢谷水通志在韓城縣西北百十里水經注暢谷水自

溪東南流逕夏陽縣西北東南注于河縣志一名盤水
源出硃砂嶺歷縣北逕馮峰口東過薛曲里暖水自西
南入焉又南過帶村東入於河又縣北二十里有文水
合盤水入於河

嵎谷水通志在韓城縣西南一里水經注嵎谷水出縣
西北梁山東南流橫溪注之東南逕夏陽故城北又東
南流入河一名濂水通志濂水源出麻線嶺東流為白

馬潭

在縣西
七十里

受八水

謹按八水謂離水景封峪水洳
水澗水瀲水潦水澮水芝水

入

河

陶渠水通志在韓城縣西二十三里源出香山水經注
陶渠水出西北梁山逕司馬子長墓北東南流入河一
名芝水縣志芝川河源出方山東南流渠水遂水沆水
來會同濂水入河

靈潭韓城縣志在縣西三里峪一名青龍潭巉巖之下
將雨則絮絮雲升相傳有龍潛焉旱禱輒應山半飛閣

巋然松老莓苔如繡

已上
韓城

黃河通志在華陰縣東北四十里自朝邑界南逕縣東北與渭水合又東入潼關界水經注河水南至華陰潼關歷船司空與渭水會縣志黃河自龍門南下經本縣東北葫蘆灘寺南至潼關折而東注寺南即渭亂河處渭水通志在華陰縣北二十里自華州界來與朝邑接界又東流入於河是曰渭口杜預左傳注渭水東入河水之隈曲曰汭水經注渭水自合石橋水又東敷水注之又東良餘水注之又東合黃酸之水又東逕平舒城

北謹按平舒故城在華陰縣西北

又東逕長城北長澗水注之又東逕

華陰縣北洛水入焉闕駟以為漆沮之水又東沙渠水

注之又東逕定城北

謹按定城在華陰縣東

又東泥泉水注之又

東入河春秋之渭芮也

臣謹按舊志洛水自朝邑界來歷華陰之葫蘆灘入

渭今則東過朝邑之趙渡鎮徑入於河不復至華陰

入渭

敷水華陰縣志在縣西二十五里源出大敷谷入谷三

里有百索灘又南有槓鼓潭皆敷水之源也其谷受秦嶺以北東西諸水故其流最大經敷水鎮東北逶迤至灘子里入渭水經注敷水南出石山之敷谷北逕告平

城東

謹按告平城故蹟在華陰縣西

北流注于渭

良餘水通志在華陰縣西二十里水經注良餘水南出良餘山之陰北流入于渭俗謂之宣水

黃酸水通志在華陰縣西十三里水經注黃酸水世名之為干渠水水南出升山北流注于渭縣志黃酸水至

干渠頭東流過頁橋合仙谷水

謹按仙谷水源出谷中車箱潭亦謂之車箱水

又北逕縣西長城橋下又東流入于渭

長澗水通志在華陰縣西門外水經注長澗水源出太華山側長城東而北流注于渭縣志源出蓮峰水簾洞玉泉三伏見循古長城北注為王家河過縣西為西河又西轉北折而東流為清河又東至員莊入于渭又有小澗水在縣南一名寶谷水源出王刁洞西北流逕城南入長澗水又有大澗水在縣東南源出黃神谷一名

黃龍潭水俗曰大澗西北流入長澗河

沙渠水通志在華陰縣東十五里水經注沙渠水出南山北流又西北入長城又北入渭一名蒲澗水

泥泉水通志在華陰縣東三十五里水經注泥泉出南山靈谷北流注於渭縣志靈谷在水谷西今近水谷下有泉水濁而赤由小月溝金盆寨過橋西北注於渭或以為即泥泉水也

陽華澗通志在華陰縣東南呂氏春秋九澗秦之陽華

高誘注桃林西長城是也晉書載記太元九年慕容洪
符獻戰於華澤胡三省通鑑注華陰之澤也或以為即
陽華藪縣志縣西南之甕谷為商洛經道入谷五十里
東轉為華陽川即古陽華之藪也

已上
華陰

洛水通志在蒲城縣東四十里太平寰宇記洛水亦曰
沮水縣志洛水經白水澄城入縣境合南河水折而東
南流入同州境

白水河通志在蒲城縣北自白水縣流入界內入洛縣

志白水即同官之烏泥川入縣境或名丁家河或名高家河皆以傍水居民為名東流納白石水龍門溝虎頭溝諸水歷縣境北經五龍山陰入於洛

溫湯通志在蒲城縣東六十里源出沮水東岸石穴中又西流里許入於沮水四時溫暖可浴縣志一名溫塘旁有太湖山平地突起周五六里高十餘仞左右危石流泉為邑名勝

園中長安志在蒲城縣南二十里漢書宣帝紀宣帝微

時嘗困於蓮勺鹵中注如淳曰蓮勺有鹽池縱廣十餘里其鄉人名曰鹵中服虔曰或曰澤中縣志今名安豐灘唐大歷十二年東池生瑞鹽後勅禁斷鹽不復生

已上蒲城

洛水禹貢錐指在白水縣東三十里自宜君界來東南逕縣東又東南入澄城蒲城界沮水舊循鄭渠東至此入洛今富平之流已絕矣雍錄洛在漆沮之東至白水縣與漆沮合而南流所謂洛即漆沮言其本同也縣志洛水抵黃龍山麓東折又南過阿門村距縣三十里又

東循五龍山陰南流入蒲

白水河通志在白水縣西三里東南流入蒲城界入洛

水經注沮水自逕當道城南

謹按當道今屬富平

又東逕蓮勺縣

故城北

謹按蓮勺今屬渭南

又逕栗邑縣故城北

謹按栗邑故城在白水縣西北

又東北注於洛太平寰宇記洛水東南沮水入焉故洛

水亦名漆沮水其境東南多白玉因曰白水同州府志

即烏泥川之下流由縣西而來北受白石水又北受龍

門溝水又受虎頭溝水又折而東至五龍山陰入於洛

已上
白水

臣

謹按水經注沮水至富平分二派其一自富平逕臨潼北境入渭其一自富平至白水入洛今白水縣沮水為同官縣烏泥川之下流蓋富平之流已絕也渭水通志在華州北十五里自渭南界來又東入華陰界水經注渭水自白渠口東逕樂都城北

謹按樂都城在州西北

又東灌水注之又東合沙溝水又東合西石橋水又東

合敷水

小赤水通志在華州西三十里水經注小赤水即山海經之灌水也水出石脆之山北逕蕭加谷于狐相原西東北流與愚水合又北注于渭太平寰宇記小赤水今名高谷水

愚水通志在華州西山海經禺水出英山北流注于招水水經注愚水與招水相得亂流西北注于灌太平寰宇記愚水出孤相原華州志愚水亦名喬峪水先時西自龍灣北逕聖山村入灌水明永樂間水暴漲北逕遇

仙橋而北入渭因名遇仙橋河故道在今高塘朱渠村
諸處又有漁村川水舊入喬峪水後亦因水漲遂入遇
仙橋河或疑即古之招水也又有短嶺水亦流入遇仙
橋河

西石橋水通志在華州西十里水經注西石橋水南出
馬嶺山北流注于渭闕駟謂之新鄭水華州志石隄谷
水源出石隄谷北流至良侯村之北名五港河合赤隄
谷水入沙澗經石橋鋪以達于渭蓋即西石橋水矣

東石橋河通志在華州東水經注石橋水故沈水也亦

南出馬嶺山北流逕武平城東

謹按武平即武城縣故城在華州東

又北

逕沈城北入渭

謹按沈城即沈陽縣故城在華州東北

華州志東石橋水

源出構峪一名構峪水

謹按構當作穀即楮木也可為紙今華峪多穀故名舊作構誤

蓮花池通志在華州東南十五里阜頭峯下宋天禧五

年陷為河水深不測故一名移山潭亦謂之白厓湖潭

水又滙為數區湖側有眠雲石

西溪水通志在華州西南時人目之為小曲江以杜甫

為州司功時所嘗遊也華州志西溪水源出州南山澗
經故縣河澗諸村又太平橋水在州東亦謂之泥河亦
謂之北溪水合西溪水入渭

已上
華州

黃河在潼關北一里禹貢錐指自華陰界來逕雷首山
西本縣北又折而東是為河曲入河南界水經注河在
關內南流潼擊關山因謂之潼關自關東北流經黃巷
坂東出即函谷關也

潼河通志在潼關城下源出潼谷北流入黃河又嵩空

峪水自龍王廟北流合潼水水經注灌水出松果之上
北流逕通谷世謂之通谷水東北注于河所謂潼谷水
也或說因水以名地也元和郡縣志潼關西一里有潼
水因以名關華陰縣志水北流經蝎子山入黃河古稱
潼亭潼津皆以此

已上
潼關

關中勝蹟圖志卷十二

欽定四庫全書

關中勝蹟圖志卷十三

陝西巡撫

臣

畢沅撰

古蹟

宮闕

同州府魏萬壽殿北史魏文帝本紀大統八年十二月
行幸華州起萬壽殿於沙苑北

後周天成宮通志西魏太師宇文泰故居泰以同州扼
關河之要既專政猶時居州後孝閔帝受魏禪改同州

宮宣帝大象二年改天成宮

長春宮玉海在同州朝邑縣本周武帝作保定五年宇文護築隋開皇中修之唐書高祖本紀高祖起義兵九月次長春宮杜甫詩天晴宮柳暗長春今縣西北一里有東西長春二堡即其故址

隋金城宮唐書地理志華陰東三十里有隋金城宮

普德宮唐書地理志華州鄭縣東北三里有隋普德宮
唐咸亨二年更名神臺宮

華陰宮唐書地理志華陰縣西十八里有隋華陰宮唐顯慶三年更名瓊嶽宮

古蹟

苑園第宅附

後漢張超廬通志在華陰縣霧谷後漢張楷字公超結廬此地學者如市又能為五里霧故稱張超霧市

魏沙苑監通志在同州東西八十里南北三十里西魏大統二年宇文泰與高歡戰大破之後于用兵之處建忠武寺令騎士種柳各一株數及七千以其地宜六畜

置沙苑監養隴右牛羊諸畜以供上方之用故杜甫
沙苑行有云左輔白沙如白水繚以周墻百餘里苑中
騾牝三千匹豐草青青寒不死集異記唐明皇十三載
重九獵於沙苑雲際有孤鶴徘徊上親御弧矢一發而
中其鶴帶箭墮而復起及幸蜀遊道觀中視所掛箭道
士徐佐卿題乃上獵沙苑之日也

隋廣通倉通志在華州隋文帝以長安倉廩尚虛詔以
西至蒲陝東至衛汴水次十三州募丁運米于華州置

廣通倉以給長安

唐折衝府通志在蒲城縣唐建府有五曰相原孝德溫
泉宣化懷仁按相原今之賢相鄉舊管勲貴里者又有
崇德善德懷仁各鄉即孝德宣化懷仁諸府所由名也
伏龍府通志在澄城縣南五十里唐置兵之所太宗時
太原王榮為伏龍府折衝

古蹟

祠宇

漢華嶽廟在華陰縣東五里通志自虞舜西狩三代以

降莫不有祀然皆不廟置祠自漢武帝始光和二年修
晉書禮志魏元帝咸熙元年行幸長安使使者以璧幣
禮祀華山魏書禮志文成皇帝即位三年正月遣有司
詣華岳修廟立碑數十人在山上聞虛中若有音聲聲
中稱萬歲云冊府元龜梁太平二年八月車駕西征次
于陝命宰臣杜曉祭華岳廟並禱魏書禮志泰常七年
正月遣使以太牢祭華岳太延元年立廟置侍祀九十
人歲時祈禱水旱春秋遣官率刺史祭以牲牢有玉帛

又孝文帝紀太和二十一年五月癸卯遣使祭華岳隋書禮儀志大業十年祀華岳築場於廟側唐書高祖紀武德二年十月甲子祀華山三年四月丙申祀華山冊府元龜元宗先天二年八月癸丑封華岳神為金天王開元八年三月令太常長官祭華岳舊唐書元宗紀開元十二年十一月庚申幸東都至華陰上製岳廟碑勒之於後唐會要元宗幸東都至華州命刺史徐知仁與信安王禕勒石於華岳祠南之通衢上親製文十三年

七月七日碑成張于應天門以示百寮冊府元龜開元
二十五年十月戊申勅御史大夫李適之祭西岳天寶
三載四月丙辰令宗正卿濮陽郡王徹祭西岳八載九
月命宗正卿褒郡信王璆祭西岳九載正月文武百僚
禮部尚書崔翹等累上表請封西岳刻石紀榮號帝固
拒不許宋史禮志太祖建隆二年八月修西岳廟開寶
六年立秋日記西岳廟于華州真宗祥符四年祀汾陰
車駕至潼關遣官祀西岳用太牢備三獻禮庚午親謁

華陰西岳廟羣臣陪位廟垣內外列黃麾仗遣官分奠
廟內諸神加號岳神為順聖金天王五月乙未加上西
岳曰金天順聖帝春明退朝錄祥符四年車駕次華陰
上見岳神數里迎謁上召問老巫阿馬婆對如上所見
上加敬禮詔封為金天王上仍自書製碑文以寵異之
碑高五十餘尺濶丈餘厚四五尺天下碑莫及也其餘
刻扈從太子王公以下百官名氏製作壯麗巧無倫比
元史祭祀志至元三年定歲祀嶽鎮之制七月土王日

祀華山於華州界二十八年春二月加上西嶽金天大利順聖帝華嶽廟碑明洪武三年詔依古制止以山水本名稱西嶽華山之神王維正西嶽廟記西嶽廟圮嘉靖己亥陝西巡撫聞其事天子曰新之潼關兵備副使何鰲受椒任事於是閼宮穹閣峩闕脩廊窅窅耀耀奕奕堂堂視嶽比雄而埒麗矣續文獻通考隆慶二年六月陝西地震命撫臣張祉告祭西嶽華山之神通志朝順治八年遣禮部尚書王鐸致祭康熙元年遣左都

御史楊時薦致祭三十二年因秦省亢旱復遣致祭四十二年

聖祖仁皇帝

翠華西巡

御題露凝仙掌四字額恭懸嶽頂金天宮內廟中建石碑一座
勒

奎文四十四年

御書重修西嶽廟碑五十六年遣內閣學士查弼納致祭雍正

元年遣內閣學士田文鏡致祭

皇上御極以來屢遣大員祇詣嶽祠申禋展事廟制正殿六楹寢殿四楹兩翼司房八十餘間階下鐘鼓樓各一前為金城門再為櫺星門其外左碑亭右香亭牌樓七又前臺門五上有樓後有萬壽閣凡一百七十楹正與岳對周圍蕭牆三百七十四丈廟中古木森列唐柏五株有後周天和二年趙文淵八分書華嶽頌唐開元八年劉升八分書華嶽精享昭應之碑開元十三年呂向正

書述聖頌天寶元年韓擇木八分書告華嶽文乾元二

年顏真卿正書金天王廟題名

漢西岳華山廟碑周禮職方氏河南山鎮曰華

謂之西岳春秋傳曰山岳則配天乾坤定位山澤通氣雲行雨施賦成萬物易之義也祀典曰日月星辰所昭仰也地理山川所生殖也功加於民祀以報之禮記曰天子祭天地及山川歲徧焉自三五迭興其奉山川或在天子或在諸侯是以唐虞疇咨四岳五歲一巡狩皆以四時之中月各省其方親至其山柴祭燔燎夏商則未聞所損益周監於二代十有二歲王巡狩殷國亦有事於方岳祀以圭璧樂奏六歌高祖初興改秦淫祀太宗承循各詔有司具山川在諸侯者以時祀之孝武皇帝修封禪之禮思登假之道巡省五岳裡祀豐備故立宮其下宮曰集靈宮殿曰存仙殿門曰望仙門中宗之世重使使者持節祀焉歲一禱而二祀後不承前至于

欽定四庫全書

卷十三

亡新寢用邱墟迄今垣址營兆猶存建武之元事舉其中禮從其省但使二十石以歲時往祠其有風旱禱請祈求靡不報應自是以來百有餘年有事西巡輒過享祭然其所立碑石刻紀時事文字磨滅莫能存識延熹四年七月甲子宏農太守安國亭侯汝南袁逢掌華岳之正位應古制修廢起頽閔其若茲深達和民事神之義精通誠至約祭之福乃按經傳所載原本所由銘勒斯石垂之於後其辭曰巖巖西岳峻極穹蒼奄有河朔遂荒華陽觸石興雲而我農桑資糧品物亦相瑤光崇冠二州古曰雍梁馮于幽岐文武克昌天子展儀巡狩省方王帛之贄禮與岱亢六樂之變舞以致康在漢中葉建設宇堂山岳之守是秩是望侯惟安國兼命斯章尊修靈基肅共壇塲明德惟馨神歆其芳遏攘凶札摯歆吉祥歲其有年民說無疆唐元宗祀西岳太華山碑天有四序星辰辨其分地有五方山嶽鎮其域陰陽交暢則品物形矣精氣相射則神明著矣西岳太華山者

當少陰用事萬物生華故曰華山踞中土西偏七宮正位是稱西岳按圖以察削成而四方信焉立表以算其高五千仞明馬石壁傑堅而雄竦衆山奔走而傾附其氣肅其威振其行配金其辰直酉前對華陽之谷後壓華陰之郡左抱桃林之塞右產藍田之玉諒少昊之下都蓐收之別館者也軒帝遊焉以會衆神虞舜柴焉以觀羣后爰自夏氏迄於隋室朝更五姓載厯三千祀典相因舊章未改壇場廟宇何代不修一禱三祀無歲而缺所以報生殖事靈神不有怠也故亦詐休明災淫慝未嘗爽也皇天眷佑馨我烈祖奄有萬方建於六葉郊天地望山川精意必達典禮咸甄亦命州將四時告虔加視王秩進號金天若是何者抑有由焉予小子之生也歲庚戌月仲秋膺少昊之盛德協太華之本命故嘗寤寐靈岳盱衡神交玉帛未陳幽贊必先意而啓椒醴雖薄景福果應期而集元感昭賽可一二而道耶記云下有方士真人金鼎石室上有明星玉女仙草瓊漿茅

龍一去毛女千祀前代帝王多所僥覲朕學義文之道
故靡斯人之徒憂在至道之不宏不憂富貴之無永患
在窮生之不理不患年壽之若流以功施四海為長生
以業傳百代為不死焉羨置集靈之宮虛望非福立存
仙之殿妄思輕舉哉於戲維岳配天尚弼予志予欲布
大政康兆人獄翼予欲定禮樂諧神人岳聽予思其維
岳降神生此多士無俾申甫專美於嵩語酌古訓心通
神景善而不答誠而不應未之有也岳其念哉十有二
載孟冬之月步自京邑幸於洛師停鑾廟下清眺仙掌
雲拂石牀霓裳可接風過松嶺仙駕如聞久勤報德之
願未暇封崇之禮遂迴刻石梗概銘山萬姓瞻宇言可
復也銘曰巖巖太華柱天直上青崖白谷仰見靈掌雄
封峻削茁菑森爽是曰靈岳衆山之長白帝西下黃河
北來陰陽孕育精氣徘徊偶聖呈瑞逢昏降災玉池神
挹石室仙開海絕瀛洲天運元圃偉哉此鎮崢嶸中土
鬼神乍遊風雲忽聚高標燁日半壁飛雨自古王者巡

方必至龍駕帝服封天禪地南面會神西
后在位待予治國安人然後徐思其事

宋龍光寺在同州府北四十里宋文帝元嘉五年建明
崇禎間修

梁饒益寺朝邑縣志在縣南十里新市鎮創自蕭梁天
監間貞觀二年起十三層浮圖明初圯天順萬厯間繼
修內有藏春塢嵌歷代名人題咏

魏大統寺通志在同州府北二十五里西魏文帝建金
明昌五年修明天順六年重修

隋金塔寺通志在同州府治東隋建寺內有褚遂良書
聖教序碑宋開寶時重修

龍興寺通志在同州府西北隋開皇年建

治平寺通志在澄城縣東北四十里白家河村即隋文
帝避暑宮明萬曆四年重修

迴鑾寺通志在澄城縣南四十里隋文帝避暑迴鑾駐
蹕於此因名

唐九龍廟同州府志在大荔縣東南十餘里九龍泉唐

乾寧中連帥李公塘建每歲二月有司以牲醴修祀曰
扶龍頭居民以五月十八日報賽相傳元伊克守州禱
雨以女許神雨降而女卒遂塑像焉明鄧鏗云祈禱雖
有桑林餘意而事甚不經神若有知其羞血食於此矣
隆興寺同州志在大荔縣治東本隋文帝龍潛處舊名
興國寺唐改今名尉遲恭建

渭源寺通志在大荔縣西南五十里唐開元年建明嘉
靖三十六年修

司馬遷祠同州府志一在府城中一在府城東街名漢官祠唐時建

金龍寺朝邑縣志在縣西一里唐貞觀元年建明宣德七年重修

韓山奕應侯廟通志在郃陽縣西一里唐太和四年工部尚書譚石寶建祀韓侯奕宋政和五年禮部侍郎王顯重修

光國寺郃陽縣志在縣治西唐貞觀三十八年建宋延

祐六年宣和二年屢修明宏治元年繼修

精進寺通志在澄城縣東門外唐肅宗建有浮圖九級
本朝康熙二十三年重修

肅宗寺澄城縣志在縣西北二十五里初自唐肅宗時
憲宗元和四年重修明宏治正德間兩次興修規模崇
麗甲於一縣

雲臺觀華陰縣志在縣南八里華岳下唐建通志後周
武帝時有道士焦道廣獨居雲臺峰辟粒飧霞常有三

青鳥報未然之事武帝親詣山庭臨軒問道因於谷口
置雲臺觀徐元文記唐宋之亂希夷先生實修是觀而
隱居焉縣志明隆慶年修

本朝康熙五十七年復修又靈臺觀李裕華山記云初始

前唐亦希夷寓所堙于兵燹明洪武中建今圮右為朱

子祠徐元文記宋時有宮觀之秩朱子嘗主雲臺觀號

雲臺真逸康熙二十年知縣遲屏萬因建祠焉

唐孟郊
遊華山

雲臺觀詩華岳獨靈異草木恒新鮮山盡五色石水無
一色泉仙酒不醉人仙芝皆延年夜聞明星館時韻女

蘿絃聽茲不能寐焚柏吟道篇宋韓琦雲臺觀詩仙掌
峰前羽客家玉虛宮殿倚雲霞最高頂上誰曾到得見
蓮開十
丈花

靈應夫人祠蒲城縣志在縣西二十五里堯山唐咸通
中碑云靈應昭著一方行祠在東門內宋崇寧三年封
勅曰雨暘之期應答如響有司以聞在所旌異明天啟
間入祀典

仙臺觀長安志在蒲城縣西二十里橋陵南唐金仙玉
真二公主入道置此觀

甘露寺通志在華州南八里少華峰之西

唐張喬遊少華山甘露寺

詩少華中峰寺高秋衆景歸地連秦塞起河陽晉山微晚景蟬相應涼天雁並飛殷勤記巖石祇恐再來稀

宋靈應觀通志在朝邑縣西南三里宋大中祥符四年建在紫陽山一名紫陽觀形如箕掌宮殿參差時稱名勝張三丰曾憩息其中

魏徵祠澄城縣志魏徵封鄭國公賜莊田于澄邑子孫世居焉宋宣和間建祠于西郊金承安三年建祠于縣南門外中肖其像及五世孫魏暮侍立于左元至正七

年重修一在縣北二十里亦宋時建

后土祠韓城縣志在縣西南巍山上宋真宗祈嗣于此山下有駕到坪蓋駐蹕之所

河瀆靈源王廟通志在韓城縣東五里漁村宋大觀初因河清勅建

太史公廟在韓城南二十里宋靖康元年修

法王廟通志在韓城縣北三十里西莊神房姓名寅以宋真宗夢中治疾顯勅封五嶽法王營宇繪像以崇典

禮每歲清明四方來祀者輻輳

玉泉觀通志在華陰縣南十里宋皇祐三年建初名玉泉院內有山蓀亭旁有洞陳搏遺像在焉

金城隍廟華州志在城東南隅碑記唐乾寧三年李茂貞犯京師昭宗幸華州州刺史韓建夜袖劍詣行宮有神人厲聲叱之建倉皇出明日物色之乃華之城隍神也明年車駕還京師改元光化封神濟安侯州署東北其祠在焉大定甲午太守完顏公憫祠處于隘遷城東

南隅礮石以記神之英烈明嘉靖丙午年修

元神禹廟通志在韓城縣東北八十里元史世宗本紀
至元二年龍門禹廟成王鶚禹廟碑記禹門舊有神祠
因兵而燬道流善信鳩衆議工為殿五楹兩廡間架各
有十八寢殿營其後別為道院世祖素知善信即位時
召對及陞辭勅賜宮曰建極殿曰明德閣曰臨思仍命
大司農姚樞書額

雷祥廟白水縣志在縣東十五里大雷祥村一作雷公

亞父廟昔有雷祥善醫歿為彭衙土神嘗顯靈異蝗不為害有捍禦之功因祀焉元代常加勅封至元十二年重修墓亦在村內

明安靖寺朝邑縣志故址瀕渭水元至正元年沒于渭明正德間改建王林村東距縣三十里殿懸宋寧宗時鐘乃自渭浮來者

孫真人洞朝邑縣志在縣西北四十里雙泉鎮先是居人久議建祠未果嘉靖三十四年地震後鐮山晝夜雲

起忽有泉湧出成洞洞中自然成像彷彿真人因於洞前建祠以祀

禹廟邵陽縣志在縣西南三十里南峰山相傳禹甸梁山經此因立廟明萬厯間重建

聖母廟通志在邵陽縣南二十里慶陽村祀聖母太任太以

龍王廟澄城縣志一在縣東郭外一在縣西南三十里湫頭西岸其地洛水經焉兩崖壁立水自高岸奔下有

潭洞然深黑上常有雲氣能致雨明正統間禱雨有應
因立廟望仙觀華陰縣志距城三十里故正里漢武望
仙臺故址今為望河觀明萬曆九年修

本朝金天宮通志在華陰縣華嶽南峰巔康熙癸未

生祖仁皇帝

平華西幸

初諭撫臣鄂海撥帑金修建恭懸

御書露凝仙掌額於殿內

卜子祠通志在韓城縣東五里卜家村康熙三十七年
建河津縣西北五里許曰辛興有塚一丘相傳為子夏
墓居人多卜姓歷代封祀元末人民徙遷卜氏多涉河
而西生齒漸盛墓祭日居西河者苦涉河爰建祠以祀
伊尹祠通志在邵陽縣東四十里耕于有莘之野即此
一在學宮旁

以下建置
時代無考

韓奕廟通志在韓城縣西北里許春秋祭祀

鄭桓公祠通志在華州西關

紀信祠通志在華州東二十里柳子鎮

蘇武廟通志在韓城縣西北五里春秋祭祀

郭子儀祠通志在華州東關

顏真卿祠通志在同州府城中顏真卿嘗為此州刺史
商山神廟澄城縣志在縣北三十里世傳村東有河引
水成潭中有巨蛇時出害人行入幾斷神盪除之一方
獲安因立廟以祀

關中勝蹟圖志卷十三